



Schnitzulbank 2000

Fasnachtsgesellschaft Muotathal

Guet Tag midänand lär liäbä Lüt
lär sind üs härzlich willkommä hüt
lär wettid wieder wüssä was ds letscht Jahr isch glaufä
das cha jedä vernäh, wänn är tuäd ä Schnitzelbank chaufä.

Wenn einä scho dr Wäg i das Blettli duet gfindä
äso muess är wägedem nu witniänä afä spinnä
Da drinä näm miär jedä, isch är gross oder chli
isch im Ried vor oder im Bisisthal innä gsii.

Ä Husky hents ärschossä im Siitäwald
wämä alls aluegt isch das ä Schpott und ä Schand
drbih gsih isch einä wo diä Hünd suscht kännt
ischum ächt sinä nu niä duräbrännt.

Z'Theatr hed färä änu ächli Arbäd gäh
das hedmä us allnä Ziitägä chönnä vrnäh
sogar im Drüükönigsblettli hendsäs müässä ärwehnä
vilicht wettid di schlauä Schwyzer vo üsum Ärfolg vrtlehnä.

Im Schtützli hindä isch ä Bar
det vercherid alig gad ä par
a eim zweh heds det gläbi gad schön afä trüllä
si hend anänand nu afä z'Löchli füllä.

Sis Auto tuäd der Maa guät kännä
käs Wunder wotsä nüd eistr umämännä
einisch hedr Wassr is Öl inätah
färä hedr nu Froschtschutz i Disul inäglah

Im Alpärösli hedr übrs Schwingä diskutiärt
det hedum afäd einä d'Schnorä traktiärt
nachr hedr is Meitschä nu öppis wellä vrnäh
und scho widr hedum einä drufinä gäh.

D'Vorhöll isch hüt dr Träff vo dä Jungä
det wird hiänta änu ächli gschpunnä
ä Frau hed sich det nüd schiniärt
si isch grad ächli obenohne umägschpaziärt.

Gägä Chrüz ufä hed einä wellä äs Auto schliitä
zwee drii Kollegä hend natürli müässä riitä
midumä Bickul hends drfinätätscht ganz famos
zletscht hends nu müässä ufnä Automech los.

Ussätum Schlattli hed einä ä Umfall ghah
dr Turscht hed in abr trotzdem nüd vrlah
mitä Nummără underum Arm ischr nu öppis ga trinkä
d'Polizii hedä det gad chönnä usäwinkä.

Midum Veh sinds scho gägum Brunni ufä
zum Filmä hättr söllä ächli früänär usä
will das abr nüd hed wellä gratä
ischr duä ussä umä ufä Pragul ga wartä.

Im Riäd ischä Puur wo nu gärä tuäd chiflä
umäfarä tuedr nu flissig mitä Stiflä
plötzli hedä dr Nachbar i sim innä entdeckt
duä hends sogar mit dä Füschtä anänand gschteckt.

Färä isch einä ufnä Chrützfahrt mitr Frau
ufum Schiff hend sich diä gergärät grüän und blau
ä Goffärä hends gsuächt schiär überei
gfundä hendsäsi im Auto wos widr sind hei.

Flät voll Schnee tüänd 3 Frömd z'Reschtäränd Chrüz beträttä
gand usä midum Schnee, tuäd d'Wirtäni bättä
si hend das abr nüd ghörig kapiärt
d'Fridä hednä duä d'Jaggä usum Pfeischtr usä schpediärt.

Üsä Nazionalrat müämr änu rügä
vom ghörä sägä nachä lehrt mä lügä
wägum Theatr hedrs änu mit Kritik vrsuächt
är hed abr d'Uffüärig erscht ächli schpetr bsuächt.

Di jungä Tamburä müänd nu viil lehrä
am erschtä Tanzttag hendsäsi fiartig müässä wehrä
z'Raukä und Sufä hednä dr Bogä gäh
äs hend all voräwäg müässä usägäh.

D'Riätr Schützü hend au GV ghah
si chönid irä Schtand änüd i dem Zuäschtand lah
di gwüssnä hend anänand nühme gflattiärt
si hend det zimli hitzig diskutiärt.

Einä hed midärä Frau ä Gang wellä schwingä
sie hed inn abr änandärä nah chönnä gwinä
am nächschtämal gahdr rati anä megäräri hih
är hed duä nu ä Wuchä müässä däheimä sih.

A Frohnliichnahm isch einä ufä Mälchbärg gangä
är hed gläbi duä scho ufä Summr afä plangä
dr'appä hedr nüd grad widr wellä
drum hedr duä afä Hagschtüd schtellä.

Wänn einä ufä Stoos tuäd Schwingfäscht psuächä
söttr nüd di alt Fahrbewilligung füräsuächä
Polizii hed der Betrug abr sofort ärchännt
si hedum ä 100-fränkägi Buäss undrä Schiibäwuschr klämmt.

Frisch vrhüdated isch der guäti Maa
wämä tuäd schaffä wott mä au z'Mittag hah
si Frau hedum abr nühd wellä gäh
är heds duä müässä zu dr Muätr ga näh.

Färä am 1. April hed einä is Bisisthal wellä ga fischä
bim See hedr wäg dem Hufä Schnee gfundä kä Nischä
ä Fräsi hedr duä greicht is Tal usä
duä hedr rati mögä ufnä Tagloh ufä.

Am KTV hed adr Chilbi gfählt ä Pfyl
wägum Vrluscht wär ja das nüd äso viil
am andärä Tag hendsä duä einersmal entdeckt
är hed amä Kamel um Hals innä gschteckt.

Z'mitzt durs Land sinds am Puur mit dr Kanalisation
si hendum voranä sichr gäh äs Telefon
sis Veh hed dank nu gnuäg z'Frässä ghah
susich hättr diä Hüfä Dräck nüd im höchä Gras müässä hah.

Am Chäsminischtr isch änu einä passiärt
bimä Chäskurs hedr d'Milch gläbi zwenig probiärt
diä Chäs hedsum bläht im Kuntänänt
drinnäghah heds nu Medikamänt.

D'Auto AG diä funktioniärt
d'Schofförä sind all qualifiziärt
einä hed ä Bus wellä i d'Garasch tuä 🚗
wos tätscht hed hedrs gmerkt – z'Tor isch zuä.

Bimä Husumbu isch änu einä gseh
plötzlich chund det ä Frau vrbih
iri alt Polschtergruppe hed si wellä entsorgä idr Muldä
das hed dr Buherr abr nüd chönnä duldä.

Midum Heli sind äs par as Lauberhornrännä
vodä Spörtlär tüänds gläbi glich nu keinä kännä
au Rännfahrer hends ä keini gseh
inträssiärt heds i d'Helikopter viel viel meh.

Dr Schparverein isch färä amä Usflug gseh
alls was Rang und Namä hed isch det drbih
äs Päärli, si tüänd sich us Liäbi schiär frässä
abr zwüschedinnä z'Brüälä nüd vrgässä.

Wänn einä so ghörig ä Starchä wot sih
dä gahdr am beschtä anäs Wiibervolch hih
z'Nasäbei hedr a der Frau verzwickt
dr Vattr vonum hedärä duä nu Blüämli gschickt.

Einä isch mit dr Schwöschtr uf Züri usä
einsmal hedr nümmä gwüsst wonr sött ga pfusä
am Morged ischr ärwachät bimä Schwulä im Bett
är häts gläbi nu glih ghah usinnig nett.

Ä Schofför muäs eistr voll drah sih
öppis schaltid abr widr öppä äs Päusäli ih
bim Abladä isch einä gseh nümmä frihnä
är isch duä ga schlafä fürä i d'Kabinä.

Au färä sind d'Jegr gsi uf dr Pirsch
im Schwarzstock obä hed einä gschossä ä Hirsch
wonärä hed wellä ladä hedr gmacht grossi Augä
äs ischumä einä ä chli voranä ga raubä.

Arbäd gid äso ä Schnitzulbank z'dichtä
d'Lüt wüssid drnah au eh öppis z'brichtä
idr Fasnacht söttmä abr äs Gschpässli ärliidä
suschtuäd mä um beschtä däheimä bliibä.

Soo, ich glaubä äs täts jetzt wieder fürnäs Jahr,
das wo miär gseid hend isch mee oder mindr wahr.
Wänn einä meint är chöns bessär bringä,
dä chanär z'nächsch Jahr ä ga hälfä singä.